

e-Buletin

EDISI OKTOBER 2024

JSKM

Ts. Dr. Rozita Kadar
Pendidik Berwawasan,
Pemimpin Inspirasi.

KELUARAN KE-12

eISSN 2637-0077



9 772637 007004



ISI KANDUNGAN e-BULETIN

Sidang Redaksi:

Ketua Editor

Dr. Siti Nurleena Abu Mansor

Editor

Ts. Jamal Othman

Pn. Siti Mariam Saad

En. Ahmad Rashidi Azudin

Terbitan:



UNIVERSITI
TEKNOLOGI
MARA

Cawangan Pulau Pinang

Unit Penerbitan e-Buletin

Jabatan Sains Komputer dan Matematik

UiTM Cawangan Pulau Pinang

13500 Permatang Pauh

Pulau Pinang

Kata Pengantar Ketua Editor 02

Kata Pengantar Koordinator 03

Pendidik Berwawasan,
Pemimpin Inspirasi 04

Laporan Aktiviti 05

Perkongsian 31

Puisi 59

Uji Minda 64

PERKONGSIAN





MONOLOG SEORANG AKU (BAHAGIAN 2)

NOOR AINA ABDUL RAZAK

Selepas pulang dari bercuti, kulihat pokok yang dijaganya terletak di tepi pagar rumah sewaku. Sememangnya aku yang memintanya meletakkan di situ. Selepas subuh, aku menelefonnya untuk mengucapkan terima kasih kerana menjaganya untukku. Sejak itu, aku ternanti-nanti kedatangannya ke situ. Aku mengerti sekarang. Aku sudah mulai merinduinya. Cuma, aku tidak dapat menzahirkan dengan kata-kata. Biarlah aku pendamkan rinduku itu untuk diriku.

Aku menyibukkan diri dengan urusan kerja dan kelas part-time kerana minggu peperiksaan sudah hampir. Ketika dia datang untuk bertugas, aku mengambil peluang untuk berbual walaupun hanya seketika.

"Pukul 2 petang ini tunggu aku dekat bank." Dia membuat keputusan ketika kami bertemu tengahari itu.

"Tak ke lewat sangat?" Aku cuba memancing reaksinya.

"Habis. Aku *free* masa itu je." Dia seperti mengharap aku bersetuju sahaja dengan cadangannya.

"Ok! Ok!" Sambutku dan terus berlalu dari situ.

Petang itu, dia datang tepat seperti yang dijanjikan. Dia membawaku bersiar-siar sekitar bandar sebelum berhenti makan di restoran berdekatan. Kali ini dia nampak dalam keletihan, tetapi masih mampu untuk melayan pertanyaanku. Dalam masa yang terhad ini juga, sekali lagi aku bertanyakan soal aku dan dia. Aku tidak mahu dia kecewa kerana aku. Aku mendapat tawaran untuk melanjutkan pelajaran di luar negara. Dua tahun di luar negara bukan satu waktu yang singkat. Apa yang akan terjadi tidak dapat dijangkakan. Tetapi, terpulanglah kepada dirinya untuk melupakan aku atau tidak kerana aku tiada hak untuk memaksa. Dia hanya membisu. Bungkam barangkali. Sejak itu, aku tidak lagi menimbulkan persoalan ini.

Kami masih bertemu seperti tiada apa yang berlaku. Keluar bersiar-siar, berbual, makan dan terus pulang. Seinggalah pada satu pertemuan di sebuah tasik rekreasi. Tidak ramai orang di tasik ketika itu. Kami memilih untuk berehat dan mengambil angin di bahagian tasik yang hujung. Radio kereta dipasang dan dia mengeluarkan surat khabar yang dibelinya tadi.

“Bila kau nak ke luar negeri?” Dia mengajukan soalan untukku.

“Awal bulan Ogos,” ujarku ringkas.

“Kalau kau tak pergi, tak boleh ke?”

“I have to. Dah penat belajar, nak biarkan begitu saja? Kenapa awak tanya begitu?”

“Tak ada apa-apa. Cuma, bila kau pergi nanti, rindulah aku.”

“Rindu? Kenapa pula? Antara kita bukankah hubungan biasa?” Aku cuba menduga reaksinya.

“Entahlah. Lama mana kau di sana?”

“Dua tahun, insyaallah. Saya pun tak nak lama-lama di sana. Kalau ada rezeki lebih saya akan balik bercuti. Terpulang pada keadaan. Ini cuma rancangan, yang tentukan Allah.”

“Hmmm... lama lagilah aku dapat jumpa kau semula,” keluhnya.

Aku terus terdiam. Kenapa dia begitu beria-ria bertanyakan akan perkara itu. Ini bukan kali pertama dia berkata begitu. Apakah dia mempunyai rancangan yang tersendiri? Ah! Kenapa aku perlu risau?

“Minta paper tu. Saya nak buat teka silang kata.” Aku cuba alihkan tajuk perbualan kami.

“Rajin kau nak jawab?”

“Biasa. Dapat juga mengasah otak yang hampir beku ni. Tak nak join ke?” Pelawaku.

“Kau buatlah. Aku nak baring sekejap.”

Aku membiarkan dia berbaring di bangku. Teka silangkata tadi kucuba habiskan, tetapi ada yang aku tidak mampu jawab. Untuk memenuhi masa yang ada, aku melakarkan pemandangan tasik di hadapanku di atas surat khabar tadi. Memang pantang bagiku jika ada pen di tangan. Ada sahaja yang hendak diconteng.

“Kau buat apa tu? Melukis?” Tegurnya.

Sikit-sikit saja. Boring. Tak ada apa nak buat. Inilah kerja saya, tapi taklah secantik pelukis profesional. Untuk kepuasan diri sendiri bolehlah,” terangkan.

“Siap nanti tunjuk pada aku,” pintanya.

“Nantilah saya fikirkan. Nak tunjuk atau tidak. Awak nak buat apa bila saya tunjuk?”

“Nak tengok saja.” Kata-katanya itu diakhiri dengan ketawa kecil. “Eh! Dah pukul berapa sekarang?”

“4.20. Kenapa? Macam orang terkejut saja.”

“Alamak! Aku ada janji dengan oranglah. Kita kena balik sekarang.”

Dia menghantarku ke sebuah bank kerana aku ada urusan perlu dibuat. Pulang ke rumah, kucatatkan semuanya dalam diariku.

Selepas hari itu, aku beberapa kali menghubunginya. Aku tahu dia terlalu sibuk dengan kerjanya dan aku sendiri tidak mahu menggangu. Tetapi, bila perasaan bosan menguasai diriku, aku perlukan seseorang untuk bercerita. Yang pastinya seseorang itu adalah dia. Ya! Aku sudah mulai kenal rindu padanya. Walaupun aku cuba mengelak perasaan ini sejak mula-mula lagi, aku tidak mampu. Sesekali kami bertembung juga tanpa dirancang. Namun, tidak banyak yang dibualkan.

Sudah hampir dua bulan kami tidak keluar bersama. Hari ini aku cuba juga untuk meluangkan waktu petangku dengannya, atas permintaanku. Tetapi, sekali lagi aku menjadi seorang yang mudah sakit hati.

Kami hanya keluar untuk makan tengahari memandangkan dia mempunyai kerja yang perlu diselesaikan. Aku memahami tugasnya yang sibuk ke sana ke mari. Ah! Fikiranku benar-benar kacau. Aku kurang pasti apa puncanya. Sakit hatikah aku? Pulang ke bilik, aku terus tidur.

Kesibukan aku dengan urusan kerja, pembelajaran dan urusan untuk menyambung belajar di luar negara sekurang-kurangnya dapat meleakakan aku.

Sebulan sebelum aku ke luar negara, kami keluar untuk sekali lagi. Mungkin kali terakhir.

“Sebelum kau pergi, apa yang kau nak dari aku?” Terbit soalan yang tidak aku sangkakan ketika kami hendak pulang.

“Tak banyak. Satu sahaja permintaan saya. Saya mahu awak berada di airport semasa saya hendak bertolak. Itu sahaja.”

Departures

Check-in



“Lain pada tu tak ada?” Dia bertanya lagi.

“Itu saja. Be at the airport.” Walaupun dalam hatiku ada perkara lain yang hendak kutanyakan, aku pendamkan saja. Bagiku tidak wajar untuk menyatakannya.

Aku cuma mempunyai tiga minggu sahaja lagi untuk bersama dengannya, sebelum keberangkatanku ke Australia. Jadi, aku gunakan waktu yang singkat ini untuk menelefonnya, biarpun aku tahu tidak sepatutnya aku berbuat demikian. Apakan dayaku, kadang rasa rindu meruntun hatiku untuk bertindak demikian. Bilakah akan akhir segalanya, aku tidak dapat menduga. Hanya Allah yang mengetahuinya juga.

Hari aku berangkat, tertinjau-tinjau akan kehadirannya di balai berlepas. Sayang sekali dia tidak muncul. Aku pasrah. Mungkin dia sendiri sedang cuba melupakan.

aku nainara





الجامعة
UNIVERSITI
TEKNOLOGI
MARA

Cawangan Pulau Pinang

Unit Penerbitan e-Buletin
Jabatan Sains Komputer dan Matematik
UiTM Cawangan Pulau Pinang
13500 Permatang Pauh
Pulau Pinang

eISSN 2637-0077



9 7726 3700 7004